



FOTOS M. HARTMANN E POCHA

Flommas han sclerì la notg a Tusaun

Incendi ha destrui scrinaria veglia ed ina chasa

DA FLURIN ANDRY / ANR

■ **Tar il grond incendi a Tusaun durant la notg sin mardi han tschiffà feu ina chasa d'abitar ed ina veglia scrinaria ed arsas complettmain. Gronds donnos hai dà tar in'ulteriura chasa.** La notg vers las trais e mesa ha annunzià in abitant da Tusaun a la centrala per cloms d'urgenza da la polizia chantunala in incendi ed explosiuns en il quartier Übernolla. Il feu s'ha derasà fitg spert uschia ch'ils emprims pumpiers ch'èn arrivads han constatà che la scrinaria veglia e la chasa vischina ardevan gia plainamain. Quai valeva era per dus vehicchs parcads davant ils edificis. Tut ils corps da pumpiers da la Tumleatga e da la Muntogna sco er ils pumpiers da la Ems Chemie a Domat e da la citad da Cuira èn vegnids a Tusaun a gidar a stizzar il feu. Els han collavurà culs pumpiers da Tusaun. Manà e coordinà l'acziun dals 120 pumpiers ha *William Kloter*, tar la polizia chantunala è el schef da la regiun Mesolcina. El aveva servetsch da pichet.

■ **«Almain nun hai dà naginas victimas»** Sco che Kloter ha ditg a l'anr era l'incendi a las otg e mesa sut controlla. I saja gartegià dad impedir ch'il feu s'extendia sin la chasa vischina cun il restaurant «Beverin» e pliras abitaziuns sco er ina stalla. «Tant restaurant sco er abitaziuns han però patì da fim e fulin e subi donnos da l'aua da stizzar.» Var 20 persunas èn vegnidas evacuadas, bieras d'ellas or da las abita-

ziuns sur il restaurant. Las persunas èn vegnidas tgiradas dal Care Team Grischun e da l'uniun da samaritans locala. Ils respunsabels da la vischnanca da Tusaun han manà ils evacuads en hotels ed abitaziuns privatas. Per na disturbar ils pumpiers tar lur lavur è il traffic vegnì svià enturn Tusaun. La via chantunala tranter Tusaun e Runtgaglia è stada serrada per var quatter uras. «Per fortuna nun èn naginas persunas vegnidas blessadas u han schizunt pers lur vita», ha ditg il manader d'acziun, *William Kloter*. Ina soluziun han ins da chattar tenor el era per ils lavurers da la scrinaria ch'è arsa. Quella vegniva manada dal Center regional per intermediaziun da lavur RAV e deva lavur a var ventg persunas dischoccupadas.

Motivs per entant anc nunenconuscents

«Fin ch'igl è propi segir ch'il feu saja stizzà dapertut poi dirar ditg, e qua a Tusaun èsi da tegnair sut egl era l'ur dal gaud. Perquai avain nus guardias da feu che controllan almain fin oz la situaziun», cuntinua il perit. Davart la causa da quest incendi a Tusaun na san ins tenor el anc dir nagut. Ils spezialists per incendis sajan vegnids gia baud per examinar la situaziun sin ils lieus nua ch'igl haja ars, delclera Kloter, «a maun da perditgas e da fotografias guardan els uss co ch'il feu s'ha sviluppà, nua haja ars l'emprim, quant spert è il feu creschì ed en tge direzziun s'han derasadas las flommas.»

Sveglià regurdientschas a l'ultim incendi a Tusaun

Tar in incendi en il center vegl dal vitg da Tusaun eran ils 9 favrer 2010 arsas complettmain trais chasas d'abitar. Otg persunas eran vegnidas manadas a l'ospital causa tissiendadas da fim, var 60 persunas han stui vegnir evacuadas. L'incendi era prorut en ina chasa cun trais plauns ed ina stalla. Ils pumpiers da Tusaun nun avevan pudì impedir che la chasa ardia complettmain. Durant l'avantmezdi eran las flommas siglidas vi sin ils tetgs da las duas chasas

vischinas. Quellas avevan ars da surengiu ed eran era vegnidas destruidas complettmain dal feu e da l'aua per stizzar. 150 pumpiers da praticamain tut ils corps da pumpiers tranter Tusaun e Landquart avevan empruvà diesch uras a la lunga da stizzar l'incendi. Quai era stà però fitg difficil causa che las chasas che ardevan eran fabrigadas gist l'ina sper l'autra e las giassas eran fitg stretgas. Il donn s'amuntava a passa in milliun francs.

